



04.12.2025

Inatsisartut Suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara.

Naalakkersuisunut apeqquq:

- 1. Naalakkersuisut qanoq tigussaasunik suliniuteqarpat Kalaallisut oqaatsivut atorlugit ilinniarnertunngoorniarsinnaanngornissaq anguniarlugu?**
- 2. Qaqugu Nunatsinni oqaatsivut atorlugit tamakkiisumik ilinniarnertunngorniartoqarsinnaalissava?**
- 3. Naalakkersuisut qanoq tigussaasunik anguniagaqarpat oqaatsivut ilisimatusarnermi atortakkat inerisarniarlugit?**
- 4. Naalakkersuisut meeqqat atuarfiani oqaatsitsinnut tunngasunik atuartsissutaasussanik inerisaanissamut qanoq takorluuippat?**

A) Naalakkersuisut sumioorpaluutsit Tunumiusut Avanersuarmiusullu atuartsissutissatut ilanngussinnaaneri takorluugarivaat?

(Inatsisartunut ilaasortaq Nivi Rosing, Inuit Ataqatigiit)

Tunngavilersuut:

Oqaatsivut Nunatsinni tassaapput uagut Kalaallit tulluusimaarutigalugit kinguaariippassuani atukkagut, kinaassusitsinnut tulluartut, avatangiisitsinnut tulluarsaqqissaarnikut, pinngortitap pillugu paasinnittariaasitsinnut tulluaqqissaartut taamaammat uggorivara ukioq 2025-miilluta sulii oqaatsivut tamakkiisumik atorlugit ilinniarnertunngorniartoqarsinnaanngimmat.

Namminersorneq pillugu inatsimmi oqaatsivut pisortatigoortutut naqissuseqqapput.

Ukiumut oqaatsivut atorlugit oqaluttartut ikitsumik procentimik ikilisarput, taanna kisitsik mumisikkusunnaarpoq, ukiumut oqaatsivut atorlugit oqaluttut amerliartortilerlugit. Taamaammat oqaatsivut piujuartillugit kinguaatsinnullu ingerlateqqinniarutsigut ilinniartitaanerminni minnerpaamik oqaatsivut atorsinnaasariaqarpagut. Taamaammat neriullunga Naalakkersuisut sukumiisumik oqaatsivut atorlugit ilinniarsinnaaneq pimoorullugu anguniagaqarfigaata.

Meeqqat atuarfiani atuarluni atortut amerlanerpaat danskinningaanneerput danskit kulturianut paasinnittariaasaanut pinngortitaanullu tulluarsakkat Kalaallisut nutserneqarnikut.

Meeqqat Nunatsinniittut angusarissaarnissaat anguniarlugu atuarnermi avatangiisigut, kulturerput pinngortitarpullu aallaavigisariaqarparput, minnerunngitsumik sumioorpaluutsit Tunumiusut Avanersuarmiusullu meeqqat atuarfiani atorluarneqartariaqarput

sumioorpalutsit illersorniarlugit; aammami meeqqat nammineq oqaatitsik atorlugit atuarunik pissarsiaqarnerpaassapput. Meeqqat imminnut tarrarsorsinnaasariaqarput meeqqat aturfiani atuarnermi, taamaammat paaserusuppara Naalakkersuisut qanoq tigussaasunik suliniuteqarnersut meeqqat aturfiini atuartitsissutinik inerisarnissaannut minnerunngitsumillu nalimmassarnissaanut suliniutaat suunersut.

Kissaatigaara apeqqutit ullut qulit qaangiutsinnagit akineqarnissaat.